

Dithero tsa Tirelano mo Kutlwanong

Thero ka Sontaga wa 17 morago ga moletlo wa Borarabongwe, e le ka 16. 10. 2011

51/2011

Mo leineng la Modimo o e leng Rara le Morwa le Mowa o o Boitshepo!

1. Sefela sa 279 - 261/268

2. **Thapelo:** Morena Jesu Keresete, re a go leboga, ka o tlele mo lefatsheng go senya ditiro tsa ga Diabolo. Ke gona re go kopang gore o re fe go farologanya sentle fa gare go malwetse a batho ba lwalang ka ona fela, le kotsi e kgolo ya go tsenwa ke mewa e e bosula, o be o re fe go farologanya sentle fa gare ga tumelo e e sutisang dithaba, e e fodisang mmele, le tumelo e e pholosang. O re thuse gore re se ka ra latlhegelwa ke tsholofelo mabapi le pholoso ya rona e re e baakanyeditsweng ke wena, fa re sa fiwe neo e e rileng ya Mowa ya go dira se se gakgamatsang mabapi le phodiso ya mmele, gongwe mabapi le tse dingwe tsa semowa. O re utlwe ka ntlha ya lorato lo logolo lwa gago, Morena, Mopholosi wa rona. Amen.

3. Epistolo ka fa thulaganyong ya 2 e kwadilwe mo go Baroma 10:9-18;
Efangele ka fa thulaganyong ya 1 e kwadilwe mo go Matheo 15:21-28.

4.

A go ipolelwe tumelo ya bokeresete! 5. Sefela sa

6.

Thapelo ya mmadi wa thero. 7. Efangele

Mareko 9:17-27, e re: "Mongwe wa batho a mo araba a re: 'Moruti, ke tsisitse morwaake kwa go wena, o na le mowa o o semumu. Mme gongwe le gongwe kwa o mo tshwarang teng, o a mo rutlarutla, a phoke mafulo, a phuranye meno, a kwatlalale. Ke buile le barutwa ba gago gore ba o kgarametse ntle, mme ba paletswe.' Jesu a ba raya a re: 'Mofuta wa batho ba ba sa dumeleng ke lona! Ke tla nna le lona go fitlhelela leng? Ke tla lo itshokela sebaka se se kana kang? Mo tsiseng kwano go nna!' Ba mo isa kwa go ene; ya re ngwana a mmona, mowa wa akofa wa mo rutlarutla, a wela fa fatshe, a bidikama, a phoka mafulo. Jesu a botsa rraagwe a re: 'Ke sabaka se se kae a ntse a ntse jaana?' Yoo a re: 'Go tswa bonyaneng jwa gagwe. Mme gantsi o mo digetse mo molelong le mo metsing go mmolaya. Jaanong fa o nonofile go dira sengwe, re tlhomogepe pelo, o re thuse!' Jesu a mo raya, a re: 'A o a re 'Fa o nonofile?' Tsotlhe di ka dirafalela ene yo o dumelang.' Ke fa rra-ngwana a goa ka dikeledi a re: 'Ke a dumela! Thusa go tlhoka-tumelo ga me!' Mme ya re Jesu a bona batho ba tabogela mmogo teng, a kgalemela mowa o o itshekologileng, a o raya a re: 'Wena mowa o o semumu, o o bosusu, ke a go laola: Tswaa mo go ene, mme o se ka wa tlhola o boela mo go ene!' Ke fa o goa, o mo rutlarutla thata, o tswa; mosimane a nna jaaka moswi, mo ba bantsi ba bileng ba re: 'O sule.' Mme Jesu a mo tshwara seatla, a mo kakatlolola a ba a tsoga." Amen.

8. Thero: Barategi mo Moreneng Jesu Keresete, tiragalo eo ya phodiso ya mosimane yo o neng a rutlarutliwa ke mowa o o bosula e supa mmogo le dikgagamatso tse dintsi tse di dirilweng ke Jesu gore Jesu o tlele mo lefatsheng go senya ditiro tsa ga Diabolo. E bile ke tiragalo e e re rutang go farologanya fa gare ga malwetse a batho ba lwalang ka ona, le kotsi e kgolo ya go tsenwa ke mewa e e bosula, gongwe ke mewa e e itshekologileng. E bile e re ruta go farologanya fa gare ga tumelo e e sutisang dithaba, gongwe e e kgonang go dira dikgagamatso tse di rileng, e e leng neo ya Mowa o o Boitshepo e e sa fiwang badumedi botlhe, gore re e farologanye sentle le tumelo e e pholosang e e leng neo ya Mowa o o Boitshepo e e fiwang badumedi botlhe ba ba dumelang mo go Jesu Keresete, ba ba dumelang gore ba itshwaretswe maleo otlhe a bone ka go dumela mo go Jesu Keresete.

A re tlhokomeleng dipharologanyo tseo. Fa re sa di farologanye, badumedi ba ka tshwenngwa mo go maswe mo moweng. Kwa di sa farologanngweng teng, badumedi ba tsenngwa mo dipelaelong tse dintsi, le mo matshwenyegong a le mantsi, jaaka go diragala mo ditlhopheng tsa ditlhakatlhakanyo tse dintsi. Ke raya ditlhopho tse tse di rutang gore bolwetse bongwe le bongwe ke sesupo, fa motho yo o lwalang o tsenywe ke mowa o o bosula, o o itshekologileng. Ke nnete! Go na le malwetse le makoa mo bathong a a diragalang ka go tsenwa ke mewa e e bosula, e e itshekologileng. Ga re nnyenyefatse bosula joo le kotsi eo. Lefoko la Modimo le bua ka thanolo gore go a diragala. Batho ba tsenwa ke mewa e e bosula e e ba tshwenyang. Re amogela se se bolelwang mo Testamenteng e ntšhwa ka tseo. Ditiragalo tse dintsi di boletswe mo Diefangeleng, fa Jesu a ne a kgarametse mewa e e bosula ntle mo bathong. Petoro le ene o buile mo ntlong ya ga Korenelio gore Jesu o fodisitse batho ba ba neng ba gatelelwa ke Diabolo. Le mo Lefokong la thero ya kajeno re utlwa gore mowa ole o o tshwentseng mosimane yole wa mo tshwara gantsi, wa mo rutlarutla, gore a phoke mafulo, a phuranye meno, a kwatlalale. Le teng fa ba ne ba isa ngwana yole mo go Jesu, mowa wa akofa wa mo rutlarutla, a wela fa fatshe, a bidikama, a phoka mafulo. Mme re tshwanetse go gopola gore go na le ba le bantsi ba ba rutlarutliwang, ba ba welang fa fatshe, ba ba bidikamang, ba ba phokang mafulo ba sa usiwe ke mowa o o itshekologileng, ba ba lwalang ka bolwetse jwa go wa fela, ke raya le ba e leng badumedi tota, ba ba tshelang ka go dumela mo go Jesu Keresete, ba ikanya boitshwarelo jo bo mo leineng la gagwe. Go ntse fela jalo mabapi le malwetse a mangwe. A Mowa o o Boitshepo o re fe matlho a a bonang pharologanyo eo. Fa batho ba tsenwa ke mowa o o bosula, a re ba rapeleleng, re kobe mowa oo. Mme fa ba lwala fela, a re se ka ra ba tshwenya ka go bua ka ga mewa e e bosula, le go gatelelwa ke Diabolo! Re ba rapelele gore ba fodisiwe mo malwetseng a bone.

A re tlhokomeleng dipharologanyo tseo. Fa re sa di farologanye, badumedi ba ka tshwenngwa mo go maswe mo moweng. Kwa di sa farologanngweng teng, badumedi ba tsenngwa mo dipelaelong tse dintsi, le mo

matshwenyegong a le mantsi, jaaka go diragala mo ditlhopheng tsa ditlhakatlhakanyo tse dintsi. Ke raya ditlhopho tseo tse di rutang gore motho yo o sa kgoneng go fodisa ka go baya diatla, gongwe ka go rapelela molwetsi, gongwe yo o sa foleng ka go rapelelwa ke bone ba ditlhopho tseo, ba re: ga se modumedi tota, go na le se se kgaoganyang modumedi yoo le Modimo. Tota-tota go na le bakeresete ba le bantsi ba ba simololang go belaela mabapi le pholoso ya bone ka ntlha ya ditlhopho tseo. Ba belaela mabapi le tse ba di diretsweng ke Keresete mo kolobetsong, gongwe mo selalelong se se boitshepo. Ba re: Go na le se se tlhokegang mo go bone mabapi le pholoso, fa ba tlhoka phodiso ya mmele, fa ba sa kgone go fodisa balwetse ka go baya diatla. Fano re tshwanetse go farologanya fa gare ga tumelo e e balwang mmogo le dineo tsa Mowa, e le tumelo e e sutisang dithaba, e le tumelo e e sa fiweng badumedi botlhe. Go na le le ponatshego ya Mowa e e leng thusego mo go botlhe, fa batho ba fiwa go dumela gore ba itshwarelwa dibe ka ntlha ya ga Keresete, le fa e le mo kolobetsong, le fa e le mo boipobolong, le fa e le mo selalelong, mme go na le dineo tse dingwe tse di sa fiweng botlhe, jaaka Paulo a kwala, a re: “Mongwe o newa go bua ka botlhale ka Mowa, yo mongwe go bua ka kitso ka ona Mowa oo; yo mongwe o newa tumelo ka ona Mowa oo, yo mongwe dineo tsa go fodisa ka ona Mowa oo; Yo mongwe go dira dikgakgamatso, yo mongwe go bua jaaka moporofeti, yo mongwe go farologanya mewa, yo mongwe mefuta ya dipuo tsa loleme, yo mongwe phuthulolo ya dipuo tseo.”

Keresete o solofeditse boitshwarelo le pholoso le botshelo jo bo sa khutleng ka kolobetso. Keresete o buile gore yo o itshwarelwang maleo mo leineng la gagwe, o itshwaretse, a re naya mmele wa gagwe mo selalelong le madi a a boitshepo a gagwe gore re itshwarelwe maleo otlhe a rona. Yo o itshwaretsweng, e bile o na le pholoso le botshelo jo bo sa khutleng. Ka moo re tshwanetse go farologanya fa gare ga tumelo e e pholosang gore re nne le botshelo jo bo sa khutleng, le tumelo e e fodisang gore re tshele sentle mo mmeleng. Ke gona re gomotsang le ene yo o sa tlholeng a fola ka kgomotso e kgolo ya boitshwarelo jo bo mo leineng la ga Keresete, re leka go mo tiisa gore a tlhomame mo tumelong ya go dumela gore Modimo o mo amogetse, o mo go ene le mo makoang a magolo a gagwe a mmele, o tla mo ntsha mo ditlalelong tsotlhe tsa lefatshe leno, a mo ise mo legodimong mo kgalalelong le mo thabong e e sa feleng. Ke go farologanya sentle fa gare ga tumelo e e fodisang mo makoang a mmele, le tumelo e e pholosang mo makoang a semowa a a leng maleo a rona ka go re itshwarela.

Mo go tse tsotlhe tseo re gopole gore Jesu Keresete ga a ka a tlhoka sepe, le fa barutwa le monna yole, rraagwe mosimane yole, ba ne ba tlhoka tumelo eo ya go kgarametsa mowa ole ntle mo mosimaneng yole, Jesu o ne a bua le mowa ole, a o laola, a re: “Tswaa mo go ene, mme o se ka wa tlhola o boela mo go ene!” “Ke fa mowa o o itshekologileng yole o goa, o mo rutlarutla thata, o tswa.” Fa Jesu a bua, go a diragala. Re dumela mo go ene, ga re belaele mabapi le tiro e kgolo e re e diretsweng ke ene. Ka go swa ga gagwe le ka go tsoga ga gagwe o re baakanyeditse botshelo jo bo sa khutleng. A a re thuse jaanong le ka tiro e kgolo e e batlegang, re farologanye fa gare ga malwetse a e leng malwetse fela, le bosula jo bogolo jwa go tsenwa ke mewa e e bosula, re be re farologanye le fa gare ga tumelo e e sutisang dithaba, e le ya go dira dikgakgamatso, le tumelo e e pholosang ka boitshwarelo jwa dibe mo leineng la ga Jesu. Amen.

9. **Thapelo:** Morena Jesu Keresete, re a go leboga, ka o tlile go re golola mo maleong otlhe a rona, le mo losong le mo thateng ya ga Satane. O re thuse gore re go sale morago mo tumelong e e siameng, le mo loratong, le mo tsholofelong, re nnele ruri mo go tsona. O re utlwe ka ntlha ya lorato lwa gago. Amen. Thapelo ya Morena: Rara wa rona yo o mo legodimong ...

10. Sefela sa 202 - 187/195

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke E. A. W. Weber, ka ngwaga wa 1999
Kgatiso le go rongwa ga dithero tseo go tshagediwa ke kopano e e bidiwang The Lutheran Heritage Foundation.